



# Od Belgije do Tajlanda na biciklu

Deset mjeseci, 18.000 kilometara, jedan čovjek i jedan bicikl. Cilj: Tajland. U ovu biciklističku avanturu upustio se 31-godišnji Belgijanac Bart Vanden Hautte, koji se, kad jednom stigne do Tajlanda, kući namjerava vratiti – avionom

Napisala **Mersiha Drinjaković**  
Snimio **Jasmin Brutus**

**Z**nam da sam trebao zasnovati porodicu, praviti kuću, graditi karijeru, ali ne, evo me, krenuo sam na put oko svijeta", veli Bart Vanden Hautte (31), Belgijanac iz malog mjesta Oudenaarde, koji se upustio u desetomjesečnu avanturu biciklom. Cilj mu je Tajland, procjenjuje da se radi o ruti dugoj 18.000 kilometara, ali ostavlja mogućnost da se put i produži ako odluči da ne ide po planiranom rasporedu. Sreli smo ga u Sarajevu, a plan mu je otići u Tursku, Gruziju i Azerbejdžan, prepoloviti Kaspijsko more brodom i iskrcati se u Turkmenistanu, obići Uzbekistan i Tadžikistan, a potom Indiju, Bangladeš i ostatak jugoistočne Azije. "Iz Bangkoka se na-

mjeravam vratiti avionom, jer pretpostavljam da se tada neću željeti vratiti nazad biciklom", s osmijehom govori.

Oduvijek je volio putovati i za to je koristio svaku priliku, a što bi putovanje bilo više nalik avanturi, to mu se više sviđalo. Prije nekoliko godina napravio je turu biciklom od Belgije do Praga, i zavolio taj način putovanja, jer je, veli, najbolji za upoznavanje zemlje i ljudi. Kaže da je još od malih nogu znao da ne želi raditi za stolom, s kompjuterom pred sobom, a baš mu se to desilo proteklih pet godina, kada je radio kao menadžer u skladištu jedne kompanije za proizvodnju tekstila. Znao je da želi nešto drugačije, žudio da upozna i istraži svijet. "Rekao sam sebi: *Hajde, uradi ovo, završi s jednim poglavljem života.* Znam da će nakon ovoga pravi izazov biti da upoznam ženu svog života, kupim kuću i nađem posao koji će me ispunjavati."

Za avanturu do Tajlanda Bart se pripremao u biciklističkom klubu Pink Panthers. Na put je krenuo šestog maja, a prvih 20 kilometara pratila ga je kolona biciklista, njegovi prijatelji i poznanici. Prvi izazov bile su mu austrijske Alpe. Mislio je da će, pored Himalaje, to biti i najteži dio putovanja, ali se prevario. Smetnuo je s uma Balkan, a posebno Bosnu i Hercegovinu, u kojoj je uspon, kaže, prirodno stanje. "Ali, iako je ovo brdovita zemlja, svaki napor je višestruko nagrađen, jer uvijek imaš prekrasan pogled na okolinu." U našu zemlju ušao je preko Bosanskog Grahova, ali kad su mu se nakon beskrajnog penjanja otvorili horizonti, odmah se u nju zaljubio. U Mostaru mu se sviđela opuštena atmosfera, a Sarajevo, u koje je došao s Boračkog jezera, i na koje mu je dotad jedina asocijacija bio rat, iznenadilo i oduševilo. Toliko da je odlučio ostati dan duže, te se ponovo vratiti. ■

www.suton.ba  
www.sutongraf.hr  
www.sutonprint.me

20 godina

Časopis, koji upravo čitate, također je naš proizvod!

**SUTON**  
grafička industrija

20 godina  
vašeg  
povjerenja!

**BOSNA I HERCEGOVINA: SUTON d.o.o.**, Varaždinska 2, BiH – 88220 Široki Brijeg  
T +387 39 700 740, F +387 39 706 046, E info@suton.ba  
**HRVATSKA: SUTON GRAF d.o.o.**, Ožujjska 2, HR – 10000 Zagreb  
T +385 1 3864 065, F +385 1 3872 883, E info@sutongraf.hr  
**CRNA GORA: SUTON PRINT d.o.o.**, Bulevar Save Kovačevića 6, 26/VI, MNE – 81000 Podgorica  
T/F +382 20 622 960, M +382 69 255 655, E info@sutonprint.me